



Persónuverndar- og upplýsingaöryggisstefna Sambands Íslenskra sveitarfélaga

Samband Íslenskra sveitarfélaga hefur sett sér neðangreinda persónuverndar- og upplýsingaöryggisstefnu í samræmi við ákvæði nýsamþykktra laga um persónuvernd og meðferð persónuupplýsinga. Gildir stefnan um sérhverja meðferð persónuupplýsinga í skilningi laga um persónuvernd og við alla starfsemi á vegum Sambands Íslenskra sveitarfélaga.

Með þessari skjalfestu Persónuverndar- og upplýsingaöryggisstefnu vill Samband Íslenskra sveitarfélaga leggja áherslu á mikilvægi persónuverndar við alla vinnslu þess á persónuupplýsingum eins og þær eru skilgreindar í lögum um persónuvernd.

Tengiliðaupplýsingar

Tengiliðaupplýsingar Sambands Íslenskra sveitarfélaga eru eftirfarandi:

Heimilisfang: Borgartún 30

Sími: 515-4900

Tölvupóstur: samband@samband.is

Heimasíða: www.samband.is

Tilsjónarmaður persónuverndar er:

Nafn: Valur Rafn Halldórsson

Heimilisfang: Borgartún 30

Sími: 515-4915

Tölvupóstur: valur.rafn.halldorsson@samband.is

Skal öllum erindum beint til hans er varða persónuupplýsingar og meðferð þeirra af hálfu Sambands Íslenskra sveitarfélaga, hvort sem um er að ræða fyrirspurnir, ósk um að fá aðgang slíkum upplýsingum, ósk um breytingar eða eyðingu á gögnum.

Gögn sem Samband íslenskra sveitarfélaga vinnur með og vinnsla þeirra

Samband íslenskra sveitarfélaga safnar og vinnur með persónuupplýsingar um:

- Starfsmenn sambandsins.
- Einstaklinga er sækja um styrki sem sambandið hefur umsjón með.
- Aðila að málum er heyra undir kjarasvið sambandsins.
- Tengiliði viðskiptamanna, birgja, verktaka, ráðgjafa, stofnana og annarra lögaðila sem sambandið er í samningssambandi við.
- Starfsmenn og kjörna fulltrúa sveitarfélaga vegna greiningar á launaþróun.

Í öðrum tilvikum er í undantekningartilvikum unnið með upplýsingar um málefni einstaklinga í tengslum við ráðgjöf sem sambandið veitir viðkomandi sveitarfélögum, einkum um lögfræðileg álitaefni.

Vinnsla ofangreindra gagna er hluti af starfsemi sambandsins og byggir hún á lögum, kjarasamningum eða upplýstu samþykki skráðra aðila.

Í samræmi við það er vinnsla sambandsins unnin eftir meginreglu um gagnsæi og skulu hvers kyns upplýsingar og samskipti, sem tengjast vinnslu þessara persónuupplýsinga, vera aðgengilegar og auðskiljanlegar skráðum aðila á skýru og einföldu máli.

Sambandið leggur áherslu á að ekki sé gengið lengra í vinnslu persónuupplýsinga en þörf krefur, til að ná því markmiði sem stefnt er að með vinnslunni. Þannig safnar sambandið eingöngu persónuupplýsingum sem eru nauðsynlegar og viðeigandi með hliðsjón af tilgangi vinnslunnar. Eins leitast sambandið við að grípa til tæknilegra og skipulagslegra ráðstafana til að vernda persónuupplýsingar.

Öryggismál

Samband íslenskra sveitarfélaga hagnýtir m.a. upplýsingatækni til að varðveita gögn og miðla þeim á öruggan og hagkvæman hátt. Það auðveldar starfsmönnum - sem og skráðum einstaklingum - að hafa yfirsýn yfir skráningar, utanumhald, og vinnslu persónuupplýsinga í starfi sínu.

Hlutverk þessarar stefnu er að lýsa skuldbindingu sambandsins að vernda gögn sem sambandið varðveitir og vinnur með gegn ógnunum, innan frá og utan, vísitandi og óviljandi. Markmið stjórnunnar upplýsingaöryggis er að tryggja og vernda gögn og upplýsingakerfi gegn óheimilum aðgangi, notkun, breytingum, uppljóstrun, eyðileggingu, tapi eða flutningi.

Sambandið býr yfir persónuupplýsingum er tengjast starfsemi þess og kunna að innihalda viðkvæmar persónugreinanlegar upplýsingar sem ber að vernda sérstaklega. Hagsmunir skráðra aðila, sem tengjast málum er upplýsingarnar varða, gætu skaðast ef upplýsingarnar komast í hendur annarra en lögmætra viðtakenda, eru rangar eða eru ekki aðgengilegar þegar þeirra er þörf. Þess vegna setur sambandið þessa öryggisstefnu er varðar trúnað, réttleika og tiltækileika gagna.

Trúnaður

Samband íslenskra sveitarfélaga tryggir að eingöngu aðilar, sem til þess hafa heimild, hafi aðgang að upplýsingum hjá sambandinu og búnaði tengdum þeim.

Réttleiki gagna

Samband íslenskra sveitarfélaga tryggir að upplýsingar sem skráðar eru séu réttar og nákvæmar á hverjum tíma. Rangar, villandi, ófullkomnar eða úreltar upplýsingar séu leiðréttar, þeim eytt eða við þær aukið þegar slíkt uppgötvast og haldið uppi reglubundnu eftirliti í þeim tilgangi.

Tiltækileiki gagna

Samband íslenskra sveitarfélaga tryggir að upplýsingar skráðar hjá því séu aðgengilegar þeim sem hafa heimild og þurfa að nota þær þegar þeirra er þörf. Sambandið tryggir einnig að kerfi og gögn sem kunna að eyðileggjast sé hægt að endurreisa með hjálp viðbragðsáætlunar og afrita sem geymd eru á öruggum stað.

Öryggisstefna þessi tekur mið af gildandi lögum og reglugerðum um persónuvernd og meðferð persónuupplýsinga. Öryggisstefnan er í fullu samræmi við reglur Persónuverndar nr. 299/2001 um öryggi persónuupplýsinga.

Skyldur starfsmanna Sambands íslenskra sveitarfélaga

Samband íslenskra sveitarfélaga stuðlar að virkri öryggisvitund starfsmanna m.a. með fræðslu. Starfsemi og starfshættir skulu vera til fyrirmyndar hvað varðar upplýsingaöryggi.

Starfsmenn sem hafa aðgang að upplýsingaverðmætum og þeir vinnsluaðilar, sem koma að rekstri upplýsingakerfa, á vegum sambandsins, skulu hafa aðgang að og þekkja til þessarar öryggisstefnu. Skulu starfsmenn auk þess skrifa undir sérstaka trúnaðaryfirlýsingu. Brot starfsmanna gegn trúnaðarskyldu telst brot á starfsskyldu.

Stefna þessi skal endurskoðuð eftir því sem tilefni er til eða lög kveða á um.

Samþykkt á stjórnarfundum 29. júní 2018.

Karl Björnsson, framkvæmdastjóri